



惟園尺牘 卷肆



惟園尺牘卷四

綿上董 柴愚亭



寄畫圖

新正二十五日始接讀客秋辱惠手札得悉去秋
前一切動定欣慰欣慰溪莊次韻明秀逼人眉宇
古槐歌舊製已佳續作更氣格高古用意深湛尊
稿第三卷漸臻老境題詞殊未暢所懷何撫謙乃
爾也駢體長序非當代皇甫恐不足揚太冲美善
然竊意四六序施之俳諧小品則可獲芝大瑞似
欠宜稱至斯體專以風美流逸為主若太叢穢恐

不免疥癩馳之譏耳。况以僕之老醜而為娟好之辭。徐娘雖老。風情猶在。得無使人笑來乎。前閱吳鑑南詩中四六序氣骨得之唐人。流利衷諸宋氏。至風澤則不雜陳隋。此陳檢討未窺之妙。而吳園次所獨鳴於當代者。必為此體。似非其人。莫與屬也。如蘭集此時雖刻工可竣。但速寄稿本校。妥刷印動經時日。樓指夏季方可郵寄。呈覽耳。燕市行已令削去荆高以下數行。茲先目錄寄上。秋潭病瘡。想久經霍然矣。札候孔踈。殊歎甚也。印浦南場不便亦籌之熟矣。舊冬為設法投捐部。照亦到今。

抄錄寄梁舍親處閱畢。希為投之。并祈闕照一切進京日期。准於何日。萬里秋高。行拭目而看鵬程之遠到也。當事奪我漢魏叢書。殊可惱。幸更為留意。兩令弟試事定。各得意。賀賀。餘悉陳奴所帶前械。茲不贅率。此順候新禧。臨池神溯。

荅平山

別來星歲又數周矣。每憶光霽。何能以已。接奉手教。知先生興居。佳吉。名山盛業。日益增多。始知東南之美。固非徙會稽之竹箭已也。奉懷小詩。聊誌鄙忱。而竟獲瓊瑤之報。嗟研反覆。感與慚并。蒙惠

明史學要精審完具他時獲睹全璧枕中鴻寶寧
是過耶率此鳴謝兼候文祺

原札

培謙

紫蓋南臨獲親教益別來又兩閱春秋矣寤懷
高雅何日忘之辱荷注存瑤函惠問新集遠寄
珠玉下投捧讀之餘曷勝感戢並稔老先生杖
策譙陵興居康勝平章風月領袖江湖極文人
之樂事快羨又何如也晚藩籬斤鷄兼之聾聵
老儻殊無足為老先生道者惟日枕一編以消
歲月袖珎諸刻自愧雕蟲荷蒙榆揚過分非可

克堪近同西圃叅訂綱鑑學要一書先以明史
鑄成就正有道伏祈彈射惟知已不惜隋珠是
可禱切前正續編容俟續刻奉寄見懷隹什音
節高古未易得之貞元以下詩人也晚自忘紕
繆持土缶以荅雲璈知不免識者嗤笑耳率泐
附復並候台祺臨禔神馳曷勝翹企

寄楚良

吉光片羽已足稱珍况五十餘首之夥耶好情良
不爾習靜之功彌復遽耳今歲畢力掄元吟事想
不專及然貴友吳鑑南獲雋主文者曾以詩進

呈揣摩之下容不輟業猶恐暇時為我遥寄也率
此道意不宣

又簡

和永宇溪莊詩細意熨貼近詣何造之深也但吉
光片羽云小簡再上

原札

嘉善 吳廷幹 楚良

近得與飽雨書知老先生欲索已人近唱詎敢
故藏其拙耶緣年來好惰成癖偶有吟咏稿輒
棄去或飽雨以此相戒亦聊爾一檢過即復然
統計兩年來存者纔五十餘首而已聞命渴欲

繕寫呈政因寄書人刻期西上容續奉矣肅初
順候金安並請潭社外附和六圃先生詩箋希
賜點定餘不具

寄六圃

新正始接到客秋所惠手札伏悲動定安善而情
興倍勝欣慰何似溪莊四詠風格高妙似不可雜
瓦礫於金玉之中然良朋千里諄諄之意義復不
可苟辭率成四章應命若必阿好使附之卷末必
政定而後可次尊德堂會韻併錄政如蘭集工雖
竣但難介路隔千里校雠往返動踰歲時約五六

月間定奉到也弟近况雖病臂少得伸舒然自索
居來百憂攢集如蝟筆硯積塵可寸許詩懷酒興
殊異曩時問與諸同人為文酒之會要亦牽率從
事不足辱塵視聽所寄二稿類可知矣聲之西來
頗肯俯同鄉俗固通裁無所不可亦由玉成之德
然耶畫圃札云浙闈鄉試殊多未便冬已設法
捐貢茲書寄梁舍親處起文如飽雨已經北上希
飭紀致之聲之擬於閏五月初起身文書事宜儻
費清思便可於爾時應手帶之入京也令姪先生
以華國才繼文成講席文章事業詎可量哉羨羨

古槐歌幾欲與大阮爭驅便中幸為轉致謝教附
候不宣

原札

庭棟

兩接手示兼拜雅惠極蒙注念伏審動履佳善
詩懷酒興應各勝常欣慰欣慰聲之兄不辭跋
涉之勞千里命駕嘉賓得賢主固自應爾近來
倡和詩篇想又滿筐如蘭集聞將竣事未知何
時得一捧讀佇想之至弟園居屢跡意興不異
曩時惟是好友零落每動晨星之感殊難為懷
近刻詩箋數頁附呈教我內溪莊四詠次韻刊

箋者已有三十餘家必得大作壓卷則茲地亦藉以生色何快如之何幸如之茲因便羽率泐謹候台安臨書依溯不盡欲言

與田夫

初九日事想諸業就緒唯是老之將至何堪此傷心之舉殊為念念頃畫圃札屬轉上詩箋二六圃原箋附在西郊函中文靜北征得毋黃鳥春風之感當必有送別詩和退齋先生倚園八詩稿與在架之應發詩箋并檢示不宣

與茹文靜上舍

鄙意具載前覆數行中矣復上小詩三首以代面別不腆數事聊佐長途之需春風陌上楊柳依依翹首關山悵悵何已聲之送別詩并上托筆轉致不另不宣

覆札

綸常

捧讀手教及送別諸佳什驪訶風笛觸緒紛來在他人尚難為懷况某哉茲行雖歲月無多第千里關山未能蹴至正不知復親海嶽於何日黯然銷魂莫此為甚惟素心詩酒及時自愛為祝也承惠佳品種種來使將命醇懇謹拜而受

之浦聲老枉詩相送希轉致謝不及另札率此
上覆

寄丁觀亭

歲月不居回憶譙陵話舊時又成往昔矣天涯知
已別遠會疎屬在老懷猶深勞勩况賢昆王之殷
殷情重耶僕自庚辰歸里後惟筆墨之事夙習未
捐餘則掃除一切生人之樂大半減矣差喜浦聲
之不遠千里亦於去歲到舍話及足下擬 翠華
南巡時有獻賦之舉私心竊喜高才特達行當拭目
於三千里外也二十一史尚存春生閣中如府

中或無副本希便示知別遣人奉趙耳南望長懷
書不盡意

寄望之

足下以龍山海曲之英膺紅旆熊轡之任珠惟號
浦香亦名小真可謂風流太守者矣僕以老醜息
影巖阿唯是頽毫敗墨伴此生涯昔時對酒微譔
了不復作此間興也譙計一節管見摠約事有經
權固未可執一論耳如蘭集已告竣今奉到樣本
希為勘定南中僚屬書院諸生有覓此者便當隨
信相載額泐奉賀陞祺臨書不盡依切

候未齋先生

辰春拜違鈞表。寤寐星雲。無時暫息。老先生以名
德重望。式化中邦。春風時雨。培植深矣。往時韜甫
桑老先生主席大梁。人文蔚起。以今例之。曾何足
述。某近來。陟伏鄉閭。日益羸老。差喜平生筆墨之
緣。故習未盡。捐除。譬諸蝓蟻。自寶其丸。真堪發一
笑也。如蘭集已歲事。即奉呈。希為鑒定。稟請台安。
無任崇仰。

候圖翁

五月中奴子回拜。登補心膏。建蓮諾珍莊。誦手諭。

伏稔 翠華南巡。遣使存問。并賜祭先相國文貞
公北固山下自非振代名臣得邀 天眷如是耶
中州扈從事隔一紀而 顧問殷殷真所謂 聖
主賢臣之遇也。遥望南雲。可勝額慶。大人養望東
山。精神福量與日俱增。下視蒲柳之姿。真不可同
年而語矣。未刊稿又近千首。名山之業。何日得公
諸海內耶。謹呈如蘭集一部。伏祈鑒定。外微物數
種。希賜莞存。臨稟無任仰瞻。依沾之至。

原札

學林

前歲聞駕返珂。鄉遠懷如結。尊齒雖未臻。七旬

而僕老矣異時復過江城不識尚能握臂與否
西向曷勝遥企昨冬使者過舍得接好音兼傳
雀刻老矣漸於詩律細自是過來人語而高興
抖擻不衰尤為壽徵更令人健羨弗已拙集炎
梨後癸酉至今又積有七八百章閉戶鮮友弗
能自信邇歲興致亦殊減已頃者 翠華南巡
前赴揚州伺接叨蒙遣使垂問 賜祭先文貞
公北固山下率子姓叩謝又邀顧問庚午中州
扈從決旬衰老之形容似猶蒙 記憶附便敢
一聞之知己別來之大端耳補心膏建蓮附寄

不一

覆札

學林

使者至接手翰發函伸紙感故人之日遠荷垂
注之益深大刻蒼萃舊知義均師友陳迦陵之
篋中王司寇之感舊二集同一深情第媿濫廁
其中自慙形穢耳弟日老矣望珂鄉如在天上
自難領益側想老長兄具此勝懷或遇便南遊
未審得一繼見否兩小犬年俱十二近日學拈
弄筆墨督課之借以遣日餘無足為故人道也
南果丹玉版筍各少許附上鷺毛千里之意不

一
寄晚松

去冬作數行奉訊奴回知已出門又不獲問知出
遊何所念舊懷離可勝快悒潭中想各安善諾即
君秋風速望連飛使暮懷牢落中頓增一番氣色
此尤區區之忱可遥祝於三千里外者也寄到如
蘭集一部希為正定屬有羽便即寄數行以紓我
愁緒不宣

寄无園老人

慙直不便時趨聊借三徑為藏拙地耳急流勇退

之目慚惶甚矣古體一編懷我好音覺香山老人
猶在人間世也古槐得此一譔此樹真不朽矣哦
字韻一併見和諷誦之下歡與慚并如蘭篔簹著自
是羣彥而得大方為之弁冕不益偉乎今奉到一
部希別裁之附候興居不盡觀縷

原札

佳晴 无園

林下之樂從來士大夫極易言之為多而求其
弗難證之者便少仰見老先生急流勇退早復
十年於茲無千古獨能於是乎在頃接芳訊捧
誦之下如除清揚如蘭篔簹著固是勝舉顧僕何

人亦令廁於羣彥之後慙竦殊甚蒙索古體拙
作年來僅有十數篇已托煩飽雨覓人繕寫便
即附彼札諒不失也至哦字韻見寄之作今而
知其浮沉之故因步元押二首古槐歌竝草州
前此瑟縮者飽雨當代謝耳老年荒謬於筆墨
間念無可意以仰副高懷奈何奈何神溯心馳
斯焉未備

覆六圃

仲夏九日一鼓接新正所寄手書并記傳序題辭
詩冊及封面刻板一切非知愛如足下其能相與

如是耶維時紙窓明月槐陰轉午烹所惠佳茗點
以秋英乳花浮面清風襲人緬然想千秋名士依
古以來亦畧可覩矣而復有出於前人意緒之外
者忽動我以數年前四千里外江城聚首之歡也
硯焉孤另我勞如何前有一札并和詩二種呈上
徃歲尊德之會不能奮飛吳甸放眼觀千載嘉會
諷咏羣篇彌令人神往矣如蘭集一部附呈希為
我一政定之附候近履臨池溯洄

原札

庭棟

新正使旋附呈小札及拙作諒蒙照入近想老

先生動定多吉雅懷勝常遥為欣慰夏初接到
手示兼讀教和溪莊四詩此題和者已及百家
得鴻製為壓卷溪莊藉以生色何幸如之如蘭
集想已刻竣停雲集曾否命梓前寄呈拙製小
序懷企之情已畢現於辭畫圃於三月十六起
身此時想已抵都敝友聲之兄曾轉托沈荻林
先生料理貢事於去年八月間給有部監兩照
寄回已起應試文書畫圃入都中今知厚意
玉成於十月間復為料理停當正所謂兩不相
照也寄來敝邑尊梁令親之札不更轉達矣此

信到時聲之想已北行當另札寄入都中致之
弟近日况味不異曩時惟是交遊日少辰星之
感繫於懷而不能去翹首天涯尤令人黯然銷
魂耳貴相知西郊任先生蒙寄和章遠隔數千
里讀其詩而其人其情其學問俱可想見曷勝
仰企晤時希代致謝茲因便羽率泐奉覆臨風
懷想良晤何時可禁悵惘肅請近祺不備

覆曹小牧進士

敬覽芳訊忽焉如面傾渴之懷臨風難寫時與秋
稼倭指俊遊未嘗不羨殊才卓犖信足以跨越羣

英也比來主席姚江矜式多士夫姚乃昔賢講學地以大雅之才造沈深之域華寶之辨更不侔矣去歲見贈古槐一歌披吟之下媿喜交集尚以未窺全豹為憾而乃故示虛衷豈非可造逾深則可見益遠耶令兄想入春明久矣南北兩闈分鑿並驅高秋逸翮獲飛在指顧間耳率泐附答併候文祺

原札

嘉善曹

焜小牧

曹焜謹頓首拜白惟園老先生乙亥春得接塵談不復奉光儀者八載於茲老先生文章氣誼

到處逢迎停雲一集人係一詩詩疊一韻才大如海筆大如椽者豈易有此真摯雅切之作雖誦一過寤懷殊切焜以年來南北往還半作道途中人魚魚鹿鹿寧處不遑未獲一修箋候歎然久之歲杪從家伯父飽雨主人處兩讀尊札深荷注存且欲索觀拙稿將使梨棗受災在左右愛忘其醜過為獎借但寸心得失難昧自維學殖荒落間涉吟詠比之春蚓秋蟲浮聲細響祇益自慚去秋曾擬古槐詞一章郵便呈教鄙俚之狀略見於此然承命不敢辭亦久欲就

正匠門茲因使者之旋忽遽容遲日錄清寄達
先率此道意伏惟起居萬福不盡依切

覆心周

大暑困人別久益兼其勞文祺於時可復恬適耶
念香林中夜話闌時岸草侵燈送歸舟聽舫聲
啞散入遙空洒然清絕時復緬然尋思以為消暑
新法鞵紅三尺中頗復記此否此得飽雨快聚何
樂如之從此上金門步玉堂連袂而往益復令人
艷絕矣令親秋稼來附候動定秋高展翼予日望
之

原札

應唱

憶自柳州話別四見楊柳青青矣遙企龍門實
深馳溯祇以浮沉槐市未獲便鱗致踈音問今
夏飽雨拉都聯床話舊欣悉往來翰札稍慰調
饑老先生願養林泉主持壇坫名山千載景仰
無窮聞如蘭集開雕工竣拙詩荷蒙選錄綴下
里於白雪慚感何可言喻也飽雨復傳台指索
呈近作晚於詩道未涉籓籬違教以來復泊沒
於酌應急就搗捨趨承愈下概不存稿非敢有
辜雅望也異日天假之緣得親杖履再當分風

辟流一助騷壇鼓吹耳茲因羽便肅候近安外
附俚言一首伏祈點定

寄確軒兄

長夏恢台火雲如傘近想二兄先生順時納福為
慰弟年來屏謝世故一切唯藉筆墨作消遣計去
歲彙平生詩稿錄存數冊顏曰綿汾散人詩集欲
得兄作一序言以垂不朽第恐政府殷煩未敢以
此不急之務相煩耳目下欲刊家譜現在徵集辦
理將來告成時想亦為之序也茲有嘉善著名之
士浦君鏜字聲之者學問殊有根柢屢薦未售兩

年來延在山房教汾燧諸姪輩以弟至好去歲代
籌捐貢以入北闈儻進而見之知非時下躁進之
士容別有以獎飾之矣附候崇安不盡所懷

候田退齋侍郎

庚辰初夏得遂崇仰之私嗣復一修寸稟想塵聽
覽矣大人以熙朝碩望養重東山伏惟順時納福
某自息影衡門凡百都廢惟是破紙敗墨時復侵
尋因念前晉謁時賜讀依園八景詩吟研反覆時
復係心今春不自揣量敬和八章謹別冊錄呈譬
之春霆發聲則候蟲時鳥亦復問闕啾唧耳所刻

如蘭集已竣事今遣使呈樣本一部懇祈俯賜鑒
定外附物四種聊用將意為此肅稟金安無任瀆
冒悚息之至

覆札

陽城田懋退齋

昨歲得聆教益深慰饑渴別後鱗鴻乏便未能
時奉尺書歎仄奚似使來奉到朶雲並讀佳什
清雋超逸魏晉遺音荒園得此可以不朽矣讀
如蘭一集見老先生生平交誼之篤無愧古人
而可選又皆雅頌正聲自愧蟲吟得為貂續雖
公愛忘其醜恐海內名流見之實足為採選政

者累耳便羽肅候近祺並謝厚貺寒冬珍重不
宣

覆樸庭

憶庚辰之夏相聚快談判袂以來兩更歲籥矣頃
復何以散懷令嗣君殊才年妙奉天祿以致養人
生樂事良不過此更何必勞擾名場躬親涉閱為
哉如蘭集已竣事今奉二部一呈教政一郵寄都
門希為道意不另作札也黃琢山房詩稿容再繳
順候興居餘不一一

原札

燭文

孟夏小山飲別不覺涉秋三月中珂里優游較
之歷覽名山自當異境同樂疏公治具陸賈分
金君克兼之真神仙中人也孟嘗君處寄以八
詩回音鄭重復贈長篇詩字並美此公閉戶讀
書非虛語耳海珊於端節前有札來已重作滇
行矣郎君負笈從嘉州否高掇秋香可以預賀
兒子邀庇登第分掣戶曹弟俟冬初當圖北去
老米飯不易食恐仍不免舌耕奈何羽便率候
近祺初涼順時珍攝不一

與田夫

此番病勢較前倍甚汗後脾胃虛弱胸膈滯塞不
謂暮景沉西速易如此耶足下倘念我當一過視
且別久念深復有心曲為君傾倒者為遣力尚達
附候不宣

覆楚君

夏杪索居忽接手札情意何綿纏乃爾不謂蒲柳
衰姿尚荷垂青若此耶憶把晤津門時猶覺有詩
篇漫興之致為戲索鐵筆不謂數載而後猶不遠
千里而致之蓬牕之下亦可謂不忘平生之言矣
至蒼古跌宕何減雪漁風致謹珍藏以誌明德弟

自景入桑榆日就衰憊筆墨久被塵封媿無可應
屬別久思深伏審清窓淨几之下定順時清吉可
勝望雲馳祝率覆附候不一

原札

榕

憶自老伯泛西湖之棹烟水思深於南北庚夏
榕返京江而老伯旋還介邑行踪遂有東西之
隔矣相需殷而相遇疎何緣淺一至此耶客歲
復度楊子江直抵津門綿山在望仰止徒深卒
以諸多倣促未得盥手肅函布候福祉疎懶之
罪何可名狀昨有人自西晉來得悉動履綏和

鄙懷差慰遥念老伯豪情逸致應與年增臨風
把盞觸緒興懷之作當更滿架矣古槐亭畔夢
寐時依不審何日蹇驢綿上走訪高人祇領教
益慰茲戀切也附呈拙刻四方不堪舊石聊副
數年謬許之懷幸惟莞存是禱草艸不多及惟
期加意調攝自壽為佳

寄梁君錄

別後哀病日甚札候孔踈竊思弟雖非足下知己
然較季世交情似彼此不宜相負幸視分青白甚
勿如吳人視越人也率候不宣

與晉源

秋風薦爽心跡獲清吟興復何似耶聞文旆將返
珂里未審發軔何時日間尚可枉顧一晤否前屬
之項如諭上不宣

寄畫圃

七月初八日於秋稼函中得睹手翰雲誼溢於寸
楮慚感交集秋風得意時數并至曷勝翹祝楓丹
柿黃後盡是新貴遊教之日訂偕稼老西來俾傾
倒積愫真快事也俟花信風到再與秋稼聯鑣北
上殊未晚耳病中潦草不備

原札

錦昌

月之十八日印浦抵都敬訊起居之詳兼荷手
書之辱情文兼至感慰交并秋風伊迤逐隊匪
遙料量病軀久矣消除妄念隨意了此不了便
當偕印浦西來快抒積愫計時當在丹楓黃柿
時也茲因印浦發書聊附一行缺然叙寒暄云
再寄畫圃

月桂香中傲兀試席可想行文翻水之致奪魁之
易直如摘額底髭耳可勝望雲馳祝滿擬秋稼此
去秋風得意所向靡不通達不謂八月八日反接

文靜惡耗之札夫以秋稼之才之學之氣識渾厚
竟福慳乃爾何天道之難側若是耶北望長號悲
掉何極又我雖不負秋稼秋稼因我而西來因西
來北上而死言念及此更覺耿耿於中寤寐難安
耳文靜札云一切歛殯歸柩之費除伊薄助而外
概出三兄措置聞者莫不歎服友誼之篤而私心
感激更何如耶前奉訂枉顧之札諒入清照已設
榻以待接指去春闈尚遠望即馬首西向使我傾
倒積年離思得伸遠道筆墨難罄之深衷并認秋
稼身後之事若何鄭香有事潞子未歸家務瑣屑
祇陳元蛟一人經手此外別無可驅遣以奉迎文
駕者歎甚病中拾紙潦草不備

寄茹文靜

八月初八日奉到手札悉客中動定嘉善并爰例
之喜曷勝忻賀秋稼無病而逝天下咄咄怪事乃
爾正如所云文人無命一至於此既傷晚景蕭條
何堪失此良友又念雖死生有命至竟因我而來
此中情事更有難言之處真平生一大恨事也至
足下以新交屢破索金以相濟助近世高義如足
下者復得幾人殊令人感嘆靡已另札致飽雨即

訂得意後命駕西來詢故人身後之事若何想足
下亦整歸裝中秋後當開徑延佇抒我濶悰也不
宣

與田夫

頃接文靜札報秋稼於七月初二日無病身已真
咄咄怪事暮年聲氣之感情意之綢繆如秋稼者
復得幾人又因我而來歿於數千里外北望長號
悲悼何極其一切殮柩之資賴畫圃為之措置而
文靜兼為之助理八九月間柩即南歸同調相閱
故詳及之文靜囑代轉候不宣

與梁欣木上舍

邇來心跡若何想晴窓棊几下唯日以筆墨作生
活也孫兒六十三乳食缺否念甚三徑秋色定佳
知籬菊正爾初綻惠我數盞為望冬初脫遇水仙
為留心數枚不宣

寄觀亭

不見叔度倏忽三易裘葛怒思如何仲夏接奉手
札得聞尊堂太夫人之變曷勝驚悼劬勞罔極之
懷自仁人孝子之用心第人間無不老之人甚勿
以以忠作孝之身哀毀過情也嗚嗚弟哀病日甚

凡百俱廢久已塵封筆硯荒蕪之餘恐不足揚榆
懿美俟賤軀稍可便當郵寄奉政也二十一史特
藉遣逆旅岑寂歸里後竟未奉趙耶如蘭集一部
希為勘定外照單開於集中有名人分致之兒子
仲燧稟筆附候邇來雖漸有生色但終是蒲柳之
資附聞以慰關注宿州使君張公處賤刺同集并
上雲山蒼莽悵望何極令兄處轉致不另順候孝
履

原札

宿州
丁燾
觀亭

往昔晉謁譙陵蒙太父臺先生不遺拙陋加以

薰沐爾時偶以俗事牽累不能久住至今慚負
弗能去懷隔歲奔走稍定特遣奴子候動止擬
即擔簦從遊而父臺已盡室西行遥望隴右遠
若明河區區此心如何可言繼因先慈抱恙侍
湯藥有年去秋遂慘遭不諱五內崩裂無心人
世茲又逾半載矣三月十八日忽手教頌來下
賦 行在此自少年或有是想晚剪劣無狀廢
棄有年髮白齒搖而猶奔營過求非分恐祇令
稚圭咲人也二十一史舍間尚有一部且板在

秣陵構置尚易留此一部以奉案頭用以稍答
德意匪云報也父臺博學好古雅志林泉近與
淝水聞人日夕酌答疊案盈軸著作必夥晚恨
越在千里不能仰俯几杖一剗鴻裁望洋徒增
嘆羨耳惟願剗之餘下惠蘅茅俾得常詠清
風庶慰生平也肅此上候道履及闔第安善三
世兄恙諒愈多時正切念也茲有便鴻時錫德
音為囑統維台鑒不盡欲言

與田夫

彼此婚嫁暫畢想適時情況自少得間適可乘興

過山房清話矣初十日有烹羊近局拉西郊同來
汾陽魏衡如新到除此客與步林外他無闌入者
餘面悉不宣

與西郊

昨承枉顧稠人中未罄所懷而別為訂初十日偕
田夫同車過我坐中他客止魏衡如與步林耳不
宣

與田夫

學植荒已久尚能從事筆墨乎茲值雍園歸定死
生幽明於此永隔吾輩又安可無詩以哭病榻沉

昏之下勉成二十四韻得與失寸心殊不自知也
希大兄為我定之不宣

與雷 孝廉

弟哀病殘年交遊道絕每以不復晤對當代名流
為憾今高賢幸臨敝邑竊喜天假之緣為竟投賤
刺奉屈台旌雖奉高門前不足停林宗之駕而周
陳鄙各端欲藉叔度一消也可勝佇望令兄先生
信海內名家大集美不勝收第如蘭一集為友朋
千秋之業故選例不嫌嚴刻然吉光片羽已足垂
傳不朽况明珠七十二子承惠瓊瑤未敢重違雅

意謹對使拜登許秉謙玄度才思敏妙今之謫仙
也併欲急親風度不另率覆不宣

與梁國遵

適有言聞早晚當有建牙之慶然耶否耶曷勝翹
祝弟自卧病荒齋凡百俱廢久缺通候之牋歎仄
何可言弟腿疾日甚醫方需虎骨煮酒想射虎以
來寢皮食肉之餘或有存者諒不惜惠我一具為
遣力走布所欲附候崇祉不宣

與晉源

歲云暮矣聞文旌旋里在即念此去良晤悠邈不

禁離思紛然為訂十八日執手山房為鄭重之別
同調而外無復闌入者至期勿為風雨所阻佇望
佇望不宣

與田夫

聞晉源歲暮將歸入春即赴選人老易傷離想同
之也訂十八日過山房話別三二故舊而外無復
闌入者甚勿為歲事與風雨所阻佇望不宣

與西郊

晉源遠別良晤悠悠訂於十八日為信宿之話二
兄於此會似不宜却也附上三國志一部驗入不

宣

與田夫

歲月崢嶸行復各增一歲矣想歲事已畢正焚香
祭詩時耳呈輓秋稼詩六章希為政定春正人日
當遣陳僕南下矣附候新社餘把春卮時面罄不
宣

與文靜

無可為饋聊上南來數品少許以將意復遠道受
凍不鮮為可哂耳挽秋稼得五律六章無暇另錄
過田夫時并為政之獻歲新嘉不似徒增馬齒者

附賀不宣

寄六圃

比稔春入東園風物清美吟情酒興暢美何似弟
年來衰病日篤硯塵每積寸許可想情懷之惡又
值秋稼新逝失此良朋伯牙碎琴良有以也可遺
書箱行囊并遣僕繳上外具賻儀不腆望於浦世
兄處為道力不從心之愧續刻永宇溪莊詩畫是
名章雋句益信東南文物之盛想今已彙刻成卷
早賜為望如蘭集朱畫兄歸里時想已經呈閱今
再上一部集中可載要皆 盛世之音第恐持擇

未當為未安耳幸切教之外具乳酥葡萄二事聊
以伴函近臂復患病命兒子分代書不備

覆札

庭棟

使來詢候興居安吉兼讀札示惓惓雖足少慰
積思然馳想丰儀不獲一接塵談轉深悵快去
春有一函奉達內附停雲集序一篇及再和柯
字韻詩一首今來翰未及不識曾收入否捧讀
近稿風度稜稜筆以老而彌銳當即付梓以傳
賜教如蘭集廣聲氣而振風雅閱者無不以未
識荊州為恨實當代未有之作其為垂古名集

何疑秋稼兄客死燕臺真覺可傷數年來疊叨
厚愛今又遠贈賻儀古人所謂一死一生乃見
交情雖行路猶知感激况我輩同譜之人乎至
貺我多儀雅意實深即酥油一種不忘平生之
言拜領之下感佩何如字畫題籤應命如式題
就即交來使第恐拙書未足當清賞耳南遊曾
有舊約今詢來使知尚無期翹首西顧靡深依
溯使旋附呈湖穎泥金箋二種率泐奉覆并候
近祺不備

寄浦行可處士

憶與尊翁先生自香林論交而後相偕入亳旋復
來介情意之投真不啻竹石水乳之比方冀爰例
而後連標金榜假長安近日之便庶易於聚會期
以樂羣終歲胡天不弔奪我良朋之速若此耶京
介相去遠隔千里比聞惡耗時而靈櫬亦已南歸
每以未經親視臨終一切為歎賴朱畫兄做世兄
茹文静同客金華諾可照應為少慰耳葬期卜於
何時念哀病窮年不獲如范巨卿憑棺一哭僅具
涼儀十二兩聊代炙雞絮酒之薦賻云乎哉附呈
輓詞六章抒我情愫如蘭集工始竣實賴將伯之

助崑上一部并代呈靈几可遺書箱行李以擬奉
繳僻鄉無可托寄茲特遣家僕馳上希照單驗收
賜覆世兄今時之彩鳳角麟也當體以忠作孝之
旨以補前人之所未逮甚勿過情傷毀為囑其他
囑曹楷翁朱晝兄代致不宣病榻潦草附候孝履
臨書於邑外附敝友田夫西郊文靜挽詩各一章
并屬轉致靈次又及

覆孫皞如秀才

憶作客珂里時名父子不鄙僮夫接以優款真使
我寤寐難忘也去秋尊翁先生訃到曷勝歎惋念

仁人君子何奪耄期之享天道竟如是乎久擬札
致弔唁之私奈僻居殊乏郵置茲謹上輓詩一章
聊用抒情第不足揚揄盛德為歎耳如蘭集中僅
登大作精華若干首良以貴精而不貴多也統交
朱晝兄分致柯韻諸什氣格高老集中得此價增
何如肅候孝履病中不備

原札

嘉善孫

煒皞如

別後時於飽雨處稔邇來動定山川涉歷以詩
酒償之豪情勝概想像間猶足豁人眉宇也如
蘭一刻何時告竣下里之音亦蒙採擇感固深

矣慚又何如昨歲倅來復承垂詢兼索拙稿煒
自去秋適先君之變苦塊餘生百無一堪書生
舊業都從荒廢俟殘喘稍定當抄呈左右求大
君子之繩墨先君行狀一冊語皆據實叩懇老
先生不吝珠玉賜一寸言老先生業在千秋先
君得藉以不朽不特煒等啣恩世世矣臨池不
勝瞻仰之至

覆書圃

去歲夏秋間節次三札修候內一繳回餘二未審
浮沉何可殊可惱恨嘉平月接舍姪書始知駕已

從難陵返舍以吾三兄之華國才竟復落孫山外
聞者咸為悵快然金榜二字祇足供悵理將軍羨
歎殊不足為羅昭諫惜耳想春入芝軒景物清羨
獻壽萱堂風和棣萼此可謂人間真樂耳殊可馳
羨弟馬齒日增衰病唯侵無可為遣而平生一二
知己又遠隔天涯近復秋稼磕逝感逝傷離殊不
自聊之甚至秋稼因我西來北上而死每念及此
更不禁耿耿難安耳二十七年北上之日修金業
全附訖其所遺一切書箱行李特遣陳僕繳上外
具贖儀不腆並希代為轉致潛虬草益增老境鄙

見已附卷尾如蘭集即令照大筆改鑄者奉六十部以便分致卷中有名者合另叱名分送者別紙開具查致為感外餘四十部或寄書坊或仍煩代為分發統候尊裁弟右臂因沉醉顛倒不能把筆口授兒子燧代書不備

原札

錦昌

仲春急足南下隨遣張魁俱行於前月廿有七日偕陳紀而還敬拜手書之辱并悉鼎相清勝家政吉祥懸懸數千里喜可知也至去歲所寄之信未經接讀而昌於都門亦有三函由塘報

寄達札內未邀提及定亦未塵記室耶幾疑今之仲又有分身術矣如蘭集收到六十四部除有札及專送者轉屬尊紀送去此外檢閱卷中有名者不過三十以外人無需六十部因擬照單留餘欲囑紀帶回以往返累墜為留架上或發書賈或乘後便來携俟諭下以定行止叢書完全而無破損者甚難類此者雖覓之蘇杭亦難即得想供案頭一鑒賞具耳昌自晉歸來幾及十年從未勾當家事適者覓住房卜葬地為幼弟完姻事交集一時約需費無算且也同

社二十人或舉賢良或捷南宮或染翰鳳池或
馳驅賢路雌伏里居者什不過二三而昌居其
一矣料量身世後顧何如每一自問汗涔涔下
明歲正月下斡與舍弟畢姍後即擬出門把晤
當在孟夏如或由楚之晉則在橙黃橘綠時長
者愛我不同泛泛定有以借著為望尊集畚讀
數過清踈蒼老卓然可傳晚輩安敢贊一辭來
諭諄諄勉加圈點綴以斷句非能頌揚也聊以
抒情耳至昌自去歲場後寥落之况讐視風雅
廢筆硯已久故無可以就政者言之殊可愧也

炎蒸逼諸惟加意珍嗇

寄族弟玉林

別久念深何時方得對床風雨耶想春氣長物動
履定偕時并昌為慰余老矣髮無可白背龍鐘足
跡不及里門唯以飲酒食肉驗之或猶有數年活
世也兩宅老幼俱平順無庸懸念嗚者人生世上
無多光景宜乘時檢約不可浪自花消以致悔恨
於後耳甚勿輕老悖之言忽之前托裱帖琢玉籠
購茶諸件來書云已就何至今未到耶陳元蛟有
事嘉善諾為照應新托裱五岳圖一軸枯樹賦一

本查照單開好為辦理餘不宣

寄晚松

自戊寅歲判袂後寒暄倏爾六更寤寐相思實勞我心邇來眠食何似想天錫難老杖履春風之下其豪情逸興定不減偕遊金焦時且知漫興詩篇將所有著作錄賜以備帷園友生之鈔如蘭集工已竣其所欲宣此書之意前已節次序明不贅茲特上一部幸切教之附土物二事件函率候不宣

覆札

作新

悵別以來相思萬狀頃接朵雲自天而下離愁

為之頓解細詢尊紀知大兄先生杖履佳安著書立說月累歲增竊私心嚮往焉至所刊如蘭集雄深高渾淡遠清心無體不備誠 盛世之

鴻音諸公賴先生以傳先生操選政幾費經營而後成流播四方當不僅一時宗仰也拙作鄙俚亦附集中殊慚形穢弟年過七十雖精神未大減而齒牙動搖幾去其半毫無生趣幸里中諸先達拉入耆英會昉洛下九老遺事頗不寂寞然亦不過藉以消磨歲月耳第爾我情逾骨肉相隔數千里良晤何時寸衷常為耿耿持錄

小句數首聊伴空函使還率佈不盡馳懷

寄確軒兄

浚儀一握手後瞥忽將四更春秋矣歲月已深愁
思若何弟自息菴深居缺然通候之牋自緣魚鴻
乏便亦以散漫之辭不欲混瀆籤府也嘉平月夏
卿弟過我悉二兄德業日崇精神倍健馳羨無似
弟摟指甲年較二兄尚少五歲然已衰病侵尋心
目灰槁不謂蒲柳之質易於凋零竟若此耶如蘭
集工甫竣便上一部以吾二兄久囊括經濟今且
立功德於 熙朝寧第較長於區區章句哉然即

所登一律頸聯而論已概見生平可希所得足垂
傳不朽矣其他所載要多 盛世之善鳴者第恐
學淺識疎持擇未當耳希切教為感情因老切良
晤悠邈祝慎眠食暇通尺素右臂病廢為命兒子
燧代書所佈不宣

覆札

大梁握別屢易冰暑寤想之私與日俱積舍姪
孫入都遠承華翰關注兼讀所錄如蘭集皆當
代名公巨製以兄之不文亦得與焉雅愛懃拳
愧悚曷勝茲者愚所進呈 御覽周易揆一賴

親故代刻皆於後序列名因思老賢弟匪唯素
好兼合志同夙承獎許特敬登芳名以光簡冊
肅此奉問附候崇禧

與梁欣木

書二封如蘭集三部希照單查送春風楊柳裘馬
關山豪興何似然長途雨雪不無跋涉之勞諸希
珍重外具不腆路需之物收入不宣

候退齋先生

竊某以綿上樗櫟獲親台斗且承優款逾常感念
之私與日俱深客冬接讀手教後緣荒邨孤僻便

乏魚鵠未獲再修報候端陽後三日始得太夫人
仙遊之狀捧閱之下可勝驚愕大人孝性天成得
無哀毀骨立倘體以忠作孝之肯少節哀思以副
蒼生屬望之切此則野人望雲馳祝者也某哀病
侵尋步履艱澁恨不獲躬親唁弔特具涼儀聊陳
翦薦托聖携舍舅代叩靈几伏惟鑒照肅候孝履
與李皞如別駕

憶晤芝顏而後不覺易初夏而深秋矣寤想時切
頃聞於某因細故有天水之占此固理勢之所必
然者但某舍舅也且夙好也其性粗心直又其素

行也而胸中坦無陵谷弟意匪唯祇勿事深求且欲與之渙然冰釋然非直截了當如親家者不敢作此未見顏色之言也率候不宣

寄何田齋

頃接手教悉興居安善賢聲懋著欣慰無似前舍姪大夏之便適抱子春之憂未獲修候為歎伏讀尊集文既精粹詩復高超具見淹博淵默之妙拙序應命殊覺滓穢佛頭矣如蘭集紀一時之交遊每恨得尊稿於已刊之後嗣擬補遺二卷定推大什壓卷矣茲上一部幸切教之勿使有齒冷千秋

之戚舍任備述推烏之愛聞者莫不歎其高義但孺子未審可教否倘再承即事栽培感激之私寧第身受者已耶肅候崇祉不宣

與青田

比稔動定安舒慰甚甚橫逆一節聞者莫不以剖處咸宜曲直皆當頌其神明雖懲惡勸善固賢父母宰治之職然安善良而振風化殊足令人深感矣某家事從來鄉曲遇不經常見事自難防如川之口况有誼屬至親密友者其能遏其持平之論乎此蓋理勢之所必然者至弟少壯時且不如人

况今老矣尚能為人排解是非乎雖然賢父母有言敢不遵命以贊能者以玉成之第餘善餘殃由來尚矣竊恐非人力之所能挽為者也率覆不宣

再與青田

令似世兄枉顧山房悉偶有清暇輒埽地焚香嘯詠竟日賢而隱於下位者其不同乃爾嗣君辭氣冲和周折中禮塵談之下疊疊逼人從知烏衣公子別有一種文采風流也令先祖古菴公振代名臣聲徹朝野文章事業炳耀千秋今得遺集名貴之價真不啻如拱璧浦珠也兼及多珍敢拜嘉命

之辱秋鷺韻律細格高行當格筆矣獻歲在邇定知福履陞祺偕春并進歲莫無以為餽南品數事伴函不宣

與田夫

別久愁思殊不可言何時復一過話獻歲以來德門自卜多慶弟近况煩憂攢集如蝟殊不足為故人道邑侯隨計入覲卜於月內於弟分誼頗厚為擬送別詩一章以道意又日間送來近作二卷子風格當伯仲於晚松西平間知向之非特有事於酒也推其詩中之意豈誤有所聞而頗用意於

某乎為復用韻二首擬先呈之媿邇來絕無興會
時故出手艱澁希為我政定不敢促迫然似不宜
過遲約三日內走領無喧廬吟草小卷尚在鄴架
正畢擲下不宣

與文靜

想春興酣酣定形諸吟詠奚囊新詩又增幾許奉
到尊集一冊鄙意具見跋語第寸心自問荒植以
來畧無把握尚為容齋定詩耶笑笑前云新製屏
風故延及今始錄奉上第此覆瓿之紙恐未可以
辱清鑒耳邑侯固齋見投以詩稿卷子勉用韻數

首塵政未知尚可以致孫郎悵下否原韻錄具田
夫西郊函內愚謂風致條然氣格清峻當與如蘭
集中時學夫李西平相頡頏未審同人月旦若何
樂與詩社之舉札達田夫而未報據西郊云此舉
非田夫不可但此老性甚高雅或終與會亦未可
量茲約日偕西郊過我以決興寢索居岑寂孤吝
日深開徑延佇速駕為屬積相面悉不宣

覆札

綸常

拙稿承教定聲價應增一培矣但過譽處未免
汗顏耳謝謝詩社之舉却者甚衆田老頗敗人

意當復約於尊處一決進止勿徒遺計於道旁
之築也尊什隹甚足令小巫氣折並候近祉不
宣

再與文靜

送君北上詩檢上秋稼詩固隹而書法亦舊甚良
可藏也登如蘭集者未盡足下所長每憾相識之
晚當於惟園友生抄內萃精華暢滿以登之然準
以少陵寸心得失之語無如自定三二卷為確當
也小簡再上

與田夫

西河魏西銘想君能知之向為弟云士林無不知
有田夫西郊兩先生者舊製行看子雖廟廊江湖
雜有題詠然無兩君名作殊不無乏錢即送別之
恥也幸為一攝管以報焉此屬不宣

與西郊

前二札俱未見覆且并未示僕赴招之期悵甚昨
於五十六字中遺却三字真咄咄怪事然從可想
見老昏之狀惡趣之態良復可歎詩社一節田夫
謂同人此舉切宜鄭重若少翫狎便恐為時流所
輕弟初意特欲假此以遣未滿之年聊以漫興耳

必如所規是當還就羈勒夫使疲斃老馬復任驟服可立覩顛蹶徒見嗤於執鞭者耳則亦何樂乎為此弟當謝其不敏復憶眉山有云此道雖高才非甚習不能工是此舉實大益於同儕覺文靜意在必行者為大是而且以札要我復不欲作敗人意事熟思衡如文靜輩今騷壇之毅單也其執牛耳以主盟自有人在譬諸築黃金臺或請自隗始可耳田夫固作高曠致當另有札勸其不宜亦不能且不必然此札中意晤時可為再慇懃之倘欲面議此事如何舉行之處枉過山房當不可蹈前

次拂衣狡獪及使投轄者無權雖欲自我作古然此客惡亦甚矣呵呵邑侯疊韻見答二首吾服其才思之敏而借獎處更負深媿也另紙錄上無喧廬草一卷并為鑒定擲下附候不宣

覆札

大廩

近作俱工穩而五言尤佳勉易數字恐不免點金之消惟高明細酌之詩文酬答似無不可然渠既以詩卷相投詩中似宜道及此意何如詩社之舉非田夫不可但此老性甚高雅或終與會亦未可量弟拙納不能力勸也邑侯詩命侍

史鈞得否亦欲一寓目耳小詩二首別紙請教
去歲拙稿想評抹久矣乞擲下

與田夫

久別暫面不宿而返未面時猶冀得面可傾吐可
懷既面而未獲罄所欲言反不若未面之尚有未
盡之意也鬱結殊不可言詩社一節規以宜鄭重
勿為流輩所輕此語甚純正同人共宜遵奉為箴
也第樂與之名錫自高明今反為局外之辭雖自
置高曠恐於情理有礙而難自安耳且曠觀三晉
鼓吹風雅而樹騷壇之幟者微大兄與西郊今復

為誰若必欲開啟後進可能力辭以謝其責乎又
以大兄之慧業性成根底有素非必俟敦敦几案
而後可應者比一月之內拚得一二日工夫以盡
友朋之歡亦何損於良相功業耶伏愿謙而勿過
損高就卑勿復甚辭為禱且友朋之義何妨切直
幸亮愚狂不罪不罪脫復暇時偕西郊文靜過宿
山房商其條目附候不宣

與文靜

詩之氣格風骨并佳捉刀人真英雄也謝謝前校
尊稿恐負虛懷故多於美中索瘢然識淺學荒殊

非定論須酌之王任兩同學手札道詩社事意已
悉田夫每自高置性使然也西郊之論不舛第作
敗人意事恐又不止田夫一人夫以僕之老憊荒
蕪使復就繩墨不猶牽一老款段雖飾之以錦韜
金勒飼之以首蓿玉禾尚堪追逐驥足之騁乎失
笑失笑若不欲以老朽棄或做廬山蓮社故事使
不無有一飲酒之淵明可耳訂日偕田夫西郊過
商之不宣

覆西郊

半酣中接讀雪中杏花之什覺清芬之氣咄咄逼

人示云屬和輒率成四首醒後竊哂淺易粗直過
甚殊不足塵之几席然不有東施之相形何益見
西子捧心之絕世乎書此用彰吾二兄之美衡如
拜埽歸館時致箋上西銘之屬早為一揮以副北
征之期拙稿二卷亦希暇時即政定不足久留鄰
架聞擬望前過我開經延佇此覆不宣

原札

大廩

新詩風格老蒼兼饒秀拔之句間於鄙意有不
安者亦恐別有所據非面商不能定也免和三
章粗率之甚視原唱不啻東西施之別矣乞改

定勿包荒也衡如來館否格紙謝佳惠不宣

與魏衡如進士

嘗聞病者聞喜而減想君歸後如君當有起色矣
第倉倅言別阻修之言能不為良友懸切耶又憶
在潞時梁君錄妾絕食脩棺後或有以安娘為辭
者後果產男兒若此又是望外之喜矣然亦人間
常有事耳此訊不宣

與青田

忻逢嘉旦媿祝無長物不腆之儀伏冀莞納老父
台吏隱心遠寄情嘯詒茗椀熏爐之畔可想儵然

之致弟自去冬來目倍縞絳耳增聵聵少飲輒醉
雖把卷為舊生活然神思日昏不過如陌頭看花
過目輒忘耳睡眠瞑坐而外無復可為父臺道者
至不獲遣兒子輩代為登堂親叩想必諒其有由
也不宣恭賀純嘏臨書翹首

與思安

別後歲月已深日益哀病侵尋踈隔人事向同居
梓里猶不獲謀面一伸澗緒矧今在千里外耶每
憶津門歡會為十日飲轉盼勝事儼若隔世未審
餘生尚得復此良晤否頃聞三兄先生新荷天

眷 罷錫隆恩仍准君家承辦益銅要務并歸三
兄一手經理且觀 綸音種種 恩便之處知碩
德鴻才久在 聖人洞見中矣嗣此 國恩之沃
德門之慶可想迤臻無垠屬在葭莩得母為之翹
首額慶乎兒子分賦性疎庸棄暴學業自採芹而
畫年來復患意外之病雖漸及平復然已老大徒
傷無他屬望矣三兄其將何以責教此子耶唯是
大孫兒讀書頗聰慧其氣格亦沉静於其父兩小
孫似亦過之差可人意為少慰情耳餘無足為知
已道景物蒼茫停雲時切肅候不宣

與魏衡如

緣連日病痢委頓甚故不獲赴招夜來始少安穩
卓午可支談矣適步林自至靈邑約即日過話足
下倘有意即命中車此訂

寄畫圃

陳僕由嘉至亳病幾不起至十月方回介邑發函
伸紙嘆故人之日遠感垂念之益深細詢府中一
切欣慰無似書云春月為令弟畢姻想德門多慶
又德佳婦唯是長途修阻不獲遣价通賀為歎陳
僕遣行事起倉猝秋稼新故憤亂寡助即事多可

遺忘如今親虛受先生諸貴昆仲想均未開上凡
可應補者實應為昔時東道主人可悉希代為補
踈畧之失餘統照來札悉付書肆可耳漢魏叢書
完全可寶得之於難覓之際大費清心矣每值秋
風悵鵬翻未舉念從來百中之枚未有不操券而
者犬月暫息無過為青袍之歎令昆仲定事功日
就學業日隆快翁眠食尚能如舊否秋潭松亭想
俱心跡獲清秋門遯吉遠遊諸同人旋里否晤時
一一道問訊並致老病不及遍札紙盡不罄欲宣

覆誌昌

陳僕從南來接手字一封辭令熨貼書法端雅從
知所詣漸入佳境欣慰無似閱令兄札知春時已
畢煙事路遠未得伸意為歎抑知呂氏博議著之
何時努力前程正從此始余年近古稀衰病侵尋
可望他時緣場屋事赴都成便或肯紆道一面第
未審在何日余雖生九男兒長大者無一好紙筆
者媿爾殊多可得子詩文錄卷寄來使若曾一見
苟生媿恥之心或起憤排之志亦兄弟將助之義
也聊因便書寄數行抒我老懷不備

寄畫圃

春間日在病榻中入夏精力始少可急擬修札郵
寄已誤邑中夏時行人期矣兒子輩皆不好紙筆
故雖得明師如秋稼年來亦毫無寸進泉明天道
之歎良有由也餘幼穉祗塾師足矣附此聊覆知
已懸注之切大作合詩文乞惠一二卷蓋於豚豕
輩猶有不盡之意或藉知揣摩萬生憤悻之念其
感德為何如耶未審松亭處可以此意相轉否年
來索寞中率多感逝傷離之日即故鄉一二知己
如田夫西郊亦各老至復以事牽旬月不獲謀面
筆硯間每積塵幾寸偶一牽強為詩畧無興會即

塵政之紙從可想荒涼之况矣前札謂於二小草
勉加圈點豈負虛心者寧第望其圈點而已哉恐
真知愛者必不爾爾每憶東南故人吳越山川輒
穆然神往雖今年精力差勝於前或事勢夤緣茫
然莫定究計年量力終恐寒再遊之盟矣徒有暗
記風烟空勞夢尋耳餘悉前函不贅

答六圃

去冬小价始從南來急詢興居安舒發函伸紙辭
意殷悽感慰交并前停雲小集獲邀元晏一序復
冠以柯字韻題詩情篤之感久銘五內恍似同令

姪古槐訶早為覆訖但年來多病多忘記憶殊未
切當統希諒之尊德會詩風味脩然殊有高卧湖
山之致况得先生如安樂公定當與耆英故事并
垂不朽也永宇溪莊四詠陸續寄到箋無不佳益
信東南文物之盛想業褒卷成帙矣急欲一覽希
覓便示及如蘭集固皆宗匠時髦之什第未經酌
定良友深以持擇未當為懼定宜摘示去取未妨
改刊也拙作塵政不加斤削返以老銳批擘恐忘
形爾汝者必不爾爾邇來孤陋日甚筆硯久荒偶
一為詩更多淺率再塵所得幸切政之秋稼沒後

岑寂中夢想益切想善人之後必能振其家聲也
南遊之興雖老不淺第歎老累尚自羈紲且濟勝
日益無具唯有翹首丰儀夢接塵談耳湖顏金牋
助我漫興謹望雲拜領即題籤瑣屑不厭煩瀆益
感老至情深念知己天涯形神悠邈伏望勤裁尺
素慰我相思紙盡不備率候崇祺臨書神溯令姪
處小札轉致為屬

覆曹小牧

憶自名園幸接風采後文旌即他向流寓珂里時
雖未獲再接塵談然叔度丰神已入人深矣前辱

惠書深荷垂念感感古槐歌厯落欵寄足今斯槐
增價主人生色也恍似病中拾紙早經率覆豈浮
沉耶抑老憤遺忘耶統希諒之去冬奴南來復辱
書問訊感用情之益篤伏讀三科殊卷信華國經
國才如是如是南北修阻不克伸賀為歎大作風
骨高邁惜到稍遲不及備登如蘭集為憾然自足
高步惟園友生鈔內也見懷之什梅雪清芬真令
人寤寐難忘耳率候不宣

覆樸庭

憶從鳳臺把晤後倏忽間五更寒暄矣秋月春風

時切夢想今年春奉到手札備悉行踪辰冬由澤
入都復居停涑邑與方公為文字之飲第未知今
年又在何處令似長君既奉 旨留部當必天祿
迎養優游官閣樂可知也弟固老至然計年尚不
應鬚髮盡白齒半脫落眼非雙鏡雖大字亦不能
視龍鐘之態若過古稀可謂蒲柳易彫是也回望
舊遊地如在天上不識繼此尚得一對床塵談舌
近雖有九男兒然長大者已皆不好紙筆尚可責
幼穉之覓棗梨乎唯一孫兒甫十歲頗聰慧已
成誦三經卒業之餘聊復指示聲韻餘無足為故

人道者如蘭集每以不得十兄共為持擇為憾尚
希指示去取無妨改刊也邇來著作想又等身便
中示及使諷誦之下如對丰儀一消我鄙吝黃瓊
山房詩鈔緣復有帷園友生之鈔故今始奉繳拙
作數首塵政足見荒謬益甚矣率覆不備附候近
祺

原札

燭文

音問以踈正深馳結頃至都門兒子以所寄選
刻如蘭集見示令人增友誼之重而手札竟以
移寓失去為之悒悵然得悉近履亨嘉可慰實

多弟於辰冬以抱病由澤州赴京兒子薄宦蕭
然多剝啄索逋之聲不奈久居就館涑水方宅
而澤州舊東衛魯齊適莞其地益笑屬以兼攝
此癸未年咏伏樞舊遊地也邑宰方錦川成文
字至交詩酒唱酬為修邑乘遂爾安之竟忘寂
寞今歲新商雖訂仍舊奈東人地主俱與曩者
相反大有不可久居之勢矣遙憶杜門養高真
如仙境公即竿頭日進科甲操券可得名山事
業足著千秋更為健羨兒子今秋奉 旨准留
本部將來倘得進階弟或可稍息勞薪以慰塵

念草此佈候近祺臨穎依朔

寄五教姪

閱來札辭意悱惻。幾令不能卒讀。念無謀道之資。時逮老大。猶離鄉逐末。而我輩復慚愛。莫能助為掩札太息者久之。但當念古來多少英雄賢俊。猶有不能逃此竒數。於無可奈何中。聊順時俟命。可耳。閱寄來詩卷。知門徑未錯。目下致力於此道。昔眉山有云。此雖高才。非甚習不能工。愚謂甚習之道。須多見聞。以廣料。多強記。以求臨時湊手。多思維。以求有得於心。復要多作。以求筆機熟鍊。又此

道與制藝不同。須要諷詠領取工夫。得在偶然。蓋用悟道處多也。且姑本此為之久。則自然有得。但切勿懈怠。且忌進銳。有助長之病也。兩宅俱平順。愚雖老尚能健飯。勿以為念不宣。

寄六圃

鄙懷俱見前函。茲讀茹篆文靜者弟亡年友也。昔亦與秋稼訂交。學行兼為。散邑時髦之冠。久仰台範。每以南北阻緣。為恨。向喜研究聲韻。為錄近稿。托弟轉希。郢削倘承。不負虛懷。自切教益之感。况一經品題。價自倍增。又吾輩之樂為玉成者。題如

蘭集詩四首不及錄塵座右稿在飽雨處已屬轉致共政并索和教不宣

寄畫圃

文靜歸自都城時脩述得晤丰儀第各以事牽未獲多接塵譚為歎耳托筆轉候近稿欲得慈山一定屬弟介紹為崇札道意并希晤時煩屬勿負虛懷為感題如蘭集詩四首塵政慈山秋潭松亭處不及脩錄未審此可屬同人和題否田夫西郊并屬道意不宣

寄衡如

頃聞尊嫂夫人之變曷勝悵愕美中不足何往往然耶特遣僕上香紙并訊令兄榮旋之期想二兄石麟已兆且定得新人如絡秀之佳德門慶事亦自接踵至矣玉成之件月之十二日業過小聘禮記行看子田夫素有稽懶之號近復勿忙若再曠遲恐妨別有携往為且繳上題如蘭集詩少復推敲別紙塵覽前面屬乞好手為鈔拙詩一卷今脩去附候不宣

寄確軒兄

前節次晤素園翬亭脩述二兄真是龍馬海鶴神

姿并道晤時輒詢及弟况不以病廢見遺特憐憫於千里外可勝感慰交迭常記自道于周易圖經讀至四十餘過其所著述定勘破元機洩發秘要側聞是書前經 奏聞 至尊想定有所奉而付之剞劂耶竣時希惠頒及我當珍藏於不朽索居幽僻老無事事唯日敦敦几案擬聚古今詩分體合選集顏天籟以遺家塾子姪但因缺率就是為不備獨遼詩缺甚聞新有四朝詩選之集若已出即為郵致一部然非雅相契合不敢以林下冷澹之務相瀆籤府桑榆親故零落如晨星屈指尊齒

正是歸社之期殊不無對床之望第念曠世未有之竒遇想自瘁盡鞠躬未便輕言退老也翹首春明停雲何既努崇德業曷甚馳祝素園內舅也翬亭故人之子也學行殊不媿吾黨中人均感青目之垂暇接塵談亦足破公餘岑寂也附候崇安無既翹首

答未齋先生

頓首上未翁先生講座前憶自庚歲奉別經前歲通候而後荒邛僻址每經年缺遇鴻便未再候起居曷勝歎仄承惠頒手翰始知仍主席廡洞眠食

安舒忻慰無似而劉公轉致之札今尚未接到如
蘭集緣為例限每憾遺金石之多至其識淺學寡
持擇定多未當先生何惜明教不一示摘耶蕭齋
東砌下古槐一株植自先世枝幹偃蹇若虬龍清
蔭簷楹頗延古意概見於半壁山房集中古槐一
歌四方歌者已數十家計無大手筆恐難垂傳不
朽又附呈政近作二紙中題敝廬三首同人多有
屬和之章若得併邀寄題斯廬更多生色矣然非
素愛有持未敢以此瑣瀆聞之座右也歲月漸深
衰病已甚每懷德範夢寐徒殷傷離之感聊見於

詩肅請崇安無既翹首

原札

景陳

浩未齋

一別三載懷念時結想老先生著述名山傳世
之業日富矣前承寄大選如蘭集拙作得附諸
名家後欣感無似曾泐謝啟經年未遇便鴻七
月間始託署延津劉老先生世兄寄上想早
必達也弟比年仍客汴城年衰學荒無可為知
已道茲乘梁世兄使便率此附候近安不既

寄晉源

時為長
寧令

張別以來倏爾寒暄兩易怒思若何初聞仍居停

舊主人處可無旅中索莫情況慰甚旋喜謁選得
贛之長寧贛古名勝區非如昔蘇長公輩流亞烏
足以稱此若其地之繁簡難易初不足為足下計
知可迎_適而解但良吏苟一釋地方疾苦便當奮
千里足登要路也弟株守荒邨老隨歲臻雖尚強
飯飲酒勉事消遣然實心如灰槁了無生人趣日
唯與三二故人作冷澹生活往返酌倡耳此外殊
不足為知己道同人俱有寄懷之什拙作錄塵郅
政湖雁春歸勿惜尺素以慰遠懷可勝翹首附賀
新禧不宣



